

KANTONALNA
PRIVREDNA
KOMORA TUZLA,
BROJ 8 i 9
august/septembar
2013. GODINE



KOMORSKI INFORMATOR



**SPORAZUM O
PRIJATELJSTVU I PISMO
NAMJERE - TEMELJI BUDUĆE
SARADNJE**



**MAKEDONSKI AMBASA-
DOR U KOMORI**



**"POSTOJE REALNE OSNOVE
ZA KVALITETNIJU
SARADNJU**



**"PRIVREDA TK"-
SAJAMSKE AKTIVNOSTI**

Izdavački savjet:

1. Nedret Kikanović, predsjednik
2. Mirsad Kukić, član
3. Bajazit Jašarević, član
4. Suad Selimović, član
5. Nurdin Žunić, član

Redakcijski kolegij:

1. Nedret Kikanović, član
2. Esad Arnautović, član
3. Nurudin Žunić, član
4. Suad Selimović, član

Izdavač:

Kantonalna privredna
komora Tuzla

Gl i odgovorni urednik:

Dino Kalesić, dipl. žurnalista

**Tehnička priprema, repro i
štampa**

C.P.A. Tojšići- Kalesija

Za štampariju:

Vildan Uščuplić-generalni direktor

Tiraž:

500 primjeraka,

Adresa:

Trg slobode bb
e-mail: komora@kpkt.ba
http://www.kpktz.ba

Ministarstvo obrazovanja, nauke, kulture i sporta na osnovu Člana 19. tačka 13. stav 2. Zakona o porezu na promet proizvoda i usluga ("Sl. novine Federacije Bosne i Hercegovine", broj: 6/95 i 25/97), rješavajući o zahtjevu Kantonalne privredne komore Tuzla broj: 10/15-4481/99. od 30.04.1999. godine, dalo je mišljenje o oslobađanju poreza na promet glasila "Komorski informator".

SADRŽAJ:



**"SPORAZUM O PRIJATELJSTVU I
PISMO NAMJERE - TEMELJI
BUDUĆE SARADNJE"**

4



**MAKEDONSKI AMBASADOR U
KOMORI**

5



**"POSTOJE REALNE OSNOVE ZA
KVALITETNIJU SARADNJU"**

6



**MISTARSTVO FINANSIRA -
POSLODAVCI BEZ TROŠKA**

7



**"NEOPHODNE MJERE ZA
SUZBIJANJE SIVE EKONOMIJE"**

8



**IZ UDRUŽENJA ZA
POLJOPRIVREDNU I
PREHRAMBENU INDUSTRIJU**

9



**"BUGATTI I BURBERRY IZ KULE
GRADAČAC"**

10



**"TURSKE INVESTICIJE SU
DOBRODOŠLE"**

11



**"PRIVREDA TK" - SAJAMSK
AKTIVNOSTI**

12



**OBILJEŽEN DAN SOLARA I 128
GODINA SOLANE**

16



**30 GODINA DALJINSKOG GRIJANJA
TUZLA**

17



**"TUZLAK" U BEOGRADU - "REFRESH"
IZ "PIVARE" TUZLA**

18 i 19



**UPOZNAVANJE SA NOVIM
DOSTIGNUĆIMA U RAZVOJU
MJERNE OPREME**

20

CPA d.o.o. - vodeći proizvođač komercijalne ambalaže u BiH



www.cpa.ba

mail: info@cpa.ba tel: +387 35 635 095



GRAFIČKA PRIPREMA



SAVREMENA TEHNOLOŠKA I INFORMACIONA DOSTIGNUĆA



PROIZVODNJA REGISTRATORA



OFFSET ŠTAMPA



Ambalaža za automobilsku industriju


Ambalaža za prehrambenu industriju

Ambalaža za konditorsku industriju

Ambalaža za farmaceutsku industriju

Ambalaža za kozmetičku industriju

Ambalaža za duhansku industriju





Posjeta delegacije Bjelovarsko-bilogorske županije

"SPORAZUM O PRIJATELJSTVU I PISMO NAMJERE - TEMELJI BUDUĆE SARADNJE"

-Dvodnevna radna posjeta - Sastanak u Vladi TK - Potpisivanje Pisma namjere - Sastanak u Komori - Posjete privrednim subjektima -

Damir Bajs župan Bjelovarsko-bilogorske županije, Neven Alić zamjenik župana i Zlatko Kufner predsjednik HGK Županijska komora Bjelovar, činili su delegaciju koja je upriličila dvodnevnu radnu posjetu Tuzlanskom kantonu. Nakon sastanka sa premijerom TK Seadom Čauševićem i njegovim saradnicima i potpisivanja Pisma namjere o suradnji na provedbi zajedničkog projekta u sklopu programa Prekogrančne saradnje, delegacija iz prijateljske hrvatske regije posjetila je i Kantonalnu privrednu komoru Tuzla. Sastanku su uz Nedret Kikanovića predsjednika Komore i njegove saradnike, prisustvovali i premijer Čaušević sa svojim saradnicima te predstavnici nekoliko privrednih subjekata sa područja Tuzlanskog kantona. Predstavljene su karakteristike obje regije, razgovaralo se o dosadašnjoj saradnji te mogućnostima otvaranja novih vidova saradnje čemu u velikoj mjeri mogu doprinijeti dobri, prijateljski odnosi dvije regije, ali i već uspostavljena kvalitetna privredna saradnja. Riječ je o saradnji koju su uspostavile dvije vlade idvije komore prilikom brojnih susreta na raznim sajamskim manifestacijama u Hrvatskoj i Bosni i Hercegovini. Također, vrlo je interesantna i u priličnoj mjeri značajna do sada ostvarena privredna saradnja firmi iz dvije regije. O tome su na skupu govorili predstavnici privrednih subjekata sa područja TK: "Helios" Banovići, "Omega" doo Živinice, "Prima Sofa" Kalesija, Rudnici "Kreka" Tuzla, "Luciana" Lukavac a predstavnik Turističke zajednice TK je predstavljajući turističke potencijale dao i najnovije podatke o ovogodišnjoj turističkoj sezoni koja je oborila sve rekorde i bilježi za 26 procenata porast priliva turista u odnosu na prošlu godinu. Predstavljani su privredni kapaciteti i potencijali, kretanje industrijske proizvodnje, podaci o spoljnotrgovinskoj razmjeni, dosadašnja iskustva privrednika. **"Već dugo surađujemo, osam godina je kako smo potpisali Sporazum o prijateljstvu. Ovaj radni posjet je**



dvije komore, posjetiti privredne subjekte a sve u cilju pripreme za aktivnosti koje nas očekuju u narednom periodu", rekao je župan Damir Bajs. Inače, ovo je prva njegova posjeta kao župana jednoj od prijateljskih regija, što dovoljno govori o dobrim odnosima i ozbiljnim namjerama da se unaprijedi saradnja u oblasti privrede. **"Raduje nas posjeta uvažene delegacije iz prijateljske zemlje i regije. Razgovarali smo o privrednim kretanjima, o investiciji u proizvodnju namještaja iz ove županije u našu firmu "Prima Sofa" iz Kalesije, otvarali neke potencijalne vidove saradnje. Prije svega tu mislimo na metalnu, hemijsku industriju, poljoprivredu, sve ono gdje imamo komparativne prednosti, uz njegovanje brendova iz ove regije koji su već prisutni u našim trgovinama. Također, značajna je dobra saradnja dvije komore, posebno kada je riječ o sajamskim manifestacijama",** izjavio je Nedret Kikanović predsjednik Kantonalne privredne komore Tuzla. Već nekoliko godina za redom tuzlanska Komora organizuje i uspješno realizuje zajedničku izložbenu postavku "Privreda TK" na sajmu u Bjelovaru. **"Nastavak je ovo dobre saradnje iz prethodnog perioda. Sa županom Bajsom smo ranije razgovarali o saradnji, pa smo u 2009. godini potpisali Sporazum o saradnji a u okviru ove radne posjete smo potpisali Pismo namjere kojim se utvrđuje okvirni program u zajedničkom projektu očuvanja kulturne baštine, koji će se pripremiti na Natječaj u sklopu Programa Prekogrančne suradnje. Cilj nam je potaknuti i unaprijediti saradnju, Pismom namjere krenuti u konkretan projekat kroz niz aktivnosti a na osnovu iskustava koje naši prijatelji imaju. Želimo konkretne, kvalitetne i projekte na obostrano zadovoljstvo, u koje će biti uključeni i značajni privredni subjekti iz obje regije, za šta postoji visok nivo zainteresovanosti sa obje strane",** rekao je Sead Čaušević premijer Tuzlanskog kantona. Delegacija Bjelovarsko-bilogorske županije na čelu sa županom Damirom Bajsom, nakon sastanaka u Vladi Tuzlanskog kantona i Kantonalnoj privrednoj komori Tuzla, upriličila je i posjete u nekoliko privrednih subjekata na području Tuzlanskog kantona.



još jedan od pokušaja da se sve dogovoreno potvrdi, da se otvore novi vidovi saradnje, da se pokuša ostvariti međugranična saradnja koju smo potvrdili Sporazumom. Imamo dobra iskustva, imamo dobru saradnju, zajedno možemo napraviti puno sa projektima prema fondovima Evropske unije. Želimo ojačati privrednu saradnju, saradnju

D.K.



Susret: Kikanović – Rexhepi...

MAKEDONSKI AMBASADOR U KOMORI

- *Robni promet u iznosu od 200 miliona eura stavlja BiH u „Top 15“ zemalja sa kojima Makedonija prioritetno saraduje –*



U okviru posjete Tuzli, Nj. E. Rami Rexhepi Ambasador Makedonije u Bosni i Hercegovini, upriličio je posjetu Kantonalnoj privrednoj komori Tuzla. Uz predsjednika Komore Nedreta Kikanovića i njegove najbliže saradnike, sastanku su prisustvovali i predstavnici firmi, članica Komore, zainteresovani za ostvarivanje saradnje sa privrednim subjektima iz Makedonije. Nije ovo prva posjeta Ambasadora Rexhepija Komori Tuzla. U ranijim susretima sa privrednicima dogovarane su mogućnosti unaprjeđenja i proširenja privredne saradnje. **„Sa obje strane smo i ranije ulagali napore da se ostvari kvalitetnija saradnja privrednika iz ove regije i Makedonije. Mislim da smo od prvog našeg susreta napravili dobar posao, dobar korak ka realizaciji naših planova i ciljeva. Ipak, ne možemo reći da smo u potpunosti zadovoljni, odnosno, smatramo da postoji još puno prostora, u svim oblastima od turizma, poljoprivrede, farmacije, građevinarstva i svih ostalih oblasti, da se ta saradnja proširi. To je osnovni cilj ove posjete Tuzli i Kantonu. Smatram da upravo ovaj Kanton ima izuzetno dobro razvijenu infrastrukturu, smatramo da postoji dovoljno kvalitetnih i uspješnih kompanija za veći protok roba u oba smjera. Želimo dati podsticaj privrednicima za bolju i kvalitetniju saradnju, onima koji su već ostvarili određene kontakte, a onima koji to do sada nisu učinili, želimo otvoriti put i dati mogućnost za napredak, razvoj i obostrani uspjeh“**, rekao je Nj. E. Rami Rexhepi Ambasador Makedonije u Bosni i Hercegovini. Kako je naglašeno na ovom skupu, u prošloj godini je ostvaren promet roba u oba pravca u iznosu od 140 miliona eura. Očekivanja su da u ovoj godini robni promet može dostići 200 miliona eura čime bi se stekli uslovi za ulazak Bosne i Hercegovine na ljestvicu od „Top 15“ zemalja sa kojima Makedonija prioritetno saraduje.

Pokazateljima dosadašnje privredne saradnje Makedonije i Tuzlanskog kantona, zadovoljan je i Nedret Kikanović. Naravno, uz realna očekivanja da saradnja može i treba biti bolja. **„Mi sa Ambasadorom Makedonije imamo izuzetno dobru saradnju, posebno sa Ambasadorom Rexhepijem koji je već nekoliko puta bio naš gost. Dali smo sebi zadatak da saradnju, čijem razvoju smo dali određen doprinos u prethodnom periodu, podignemo na viši nivo. Imamo cilj da uspostavimo tješnju saradnju privrede Tuzlanskog kantona i Makedonije. Ako uzmemo u obzir podatak da je za osam mjeseci 2013. godine ostvaren izvoz u Makedoniju u iznosu od 9,7 miliona a uvoz iz Makedonije u Tuzlanski kanton u iznosu od 9,8 miliona eura, to govori o priličnom balansu kada je u pitanju spoljnotrgovinska razmjena. Znamo da ima prostora da se ta saradnja podigne na viši nivo i upravo zato smo i pozvali naše privrednike da nam se pridruže na sastanku i da zajednički razmotrimo mogućnosti novih privrednih kontakata. Dosadašnju saradnju u oblasti metalne industrije, hemijske industrije, u okviru uvoza određenih sirovina, možemo proširiti i na druge oblasti, na druge industrije a na obostrano zadovoljstvo“**, izjavio je Nedret Kikanović predsjednik Kantonalne privredne komore Tuzla. O mogućnostima nove saradnje privrednih subjekata iz Makedonije i sa područja Tuzlanskog kantona, na skupu su razgovarali i predstavnici firmi, članica Kantonalne privredne komore Tuzla, „Imel“ Lukavac, Fabrika cementa Lukavac, „Piemonte“ Tuzla, „Golden tours“ Tuzla, Turistička zajednica Tuzlanskog kantona, „Fana“ Srebrenik.

D.K.



Posjeta Ambasadora Komori...

"POSTOJE REALNE OSNOVE ZA KVALITETNIJU SARADNJU"

- Ambasador Islamske Republike Iran u BiH Seyed Hossein Rajabi posjetio Kantonalnu privrednu komoru Tuzla -

Novoimenovani Ambasador Islamske Republike Iran u BiH Seyed Hossein Rajabi, sa saradnicima je posjetio Kantonalnu privrednu komoru Tuzla. Nedret Kikanović predsjednik Komore i njegovi najbliži saradnici, izrazili su zadovoljstvo posjetom, uputili dobrodošlicu u Tuzlu, Tuzlanski kanton i Bosnu i Hercegovinu i poželjeli puno sreće u obavljanju važne dužnosti, Ambasadoru Hosseinu koji je akreditovan u BiH prije dva mjeseca. Susret je bio prilika da se razgovara o bilateralnim odnosima dvije zemlje, o karakteristikama pojedinih regija Irana, njihovim sličnostima i razlikama sa Tuzlanskim kantonom, privrednim kretanjima, te mogućnostima kvalitetnije privredne saradnje. Ambasadora i njegove saradnike je predstavio i predvodio u posjeti Tuzli i Tuzlanskom kantonu Zijad Jagodić poslanik u Predstavničkom domu Parlamentarne Skupštine Bosne i Hercegovine. Predstavio je Ambasador uz pomoć poslanika Jagodića sve karakteristike Irana i naglasio kako su veoma realne osnove za ostvarivanje saradnje.



"Želim konkretan razgovor, otvoren i jasan i konkretne poteze da povučemo kako bi i rezultati našeg susreta bili konkretni. Upoznat sam sa karakteristikama Bosne i Hercegovine i ove regije i smatram da ima osnova na kojima treba graditi buduću privrednu saradnju. Ne treba se baviti uopštenim i opširnim razgovorima, pokazateljima dosadašnje robne razmjene dvije zemlje i ove regije i Irana. Treba sagledati realne mogućnosti za unaprjeđenje tih pokazatelja, treba se opredijeliti isključivo na one projekte, firme i djelatnosti za koje znamo da postoji mogućnost da realizuju. Neophodno je približiti interese, raditi u cilju ostvarivanja profita na zadovoljstvo obje strane ali je također neophodno da se i određene administrativne barijere, prije svih vizni režim koji BiH ima prema Iranu, prilagode ostvarivanju kvalitetnije privredne saradnje, da ne budu prepreka nego podsticaj i pomoć razvoju. Iran ima puno toga za ponuditi a li isto tako ima

i puno toga što Iran može dobiti iz Tuzlanskog kantona", bio je konkretan Ambasador Hossein. Prihvaćena je ova inicijativa pa je sastanak protekao u razgovoru o preduzećima sa područja Tuzlanskog kantona koja bi mogla biti interesantna iranskim privrednicima. **"Smatramo da privredna saradnja koja je do sada uspostvaljena može i mora biti mnogo bolja. Postoje privredni subjekti koji bi mogli zainteresovati iranske privrednike prije svega zbog svojih djelatnosti, kvaliteta proizvoda, infrastrukture, lokacije, kvalitetnih kadrova i tradicije. Predložili smo Njegovoj Ekscelenciji da razmotri i iranskim privrednicima prenese prijedlog, da se pokušaju naći partneri za privredne gigante sa područja Tuzlanskog kantona koji mogu biti dobra investicija a koji trebaju ozbiljne partnere, koji trebaju pomoć kada je u pitanju revitalizacija proizvodnje, investiranje u nove tehnologije ali i ponajviše, kada je u pitanju ostvarivanje novih kontakata i osvajanje novih tržišta. S tim u vezi, preloženo je da se razmotri mogućnost ulaganja, partnerskog odnosa sa firmama koje su spremne za nove partnere, nove vlasnike, novi kapital, firme koje zasigurno mogu donijeti obostranu korist a to su "Konjuh" Živinice, Tvornica transportnih uređaja Tuzla, Fabrika deterđenata "Dita" Tuzla, Livnica čelika Tuzla",** rekao je predsjednik Kikanović. Ambasador Hossein je pokazao zainteresovanost da posjeti navedene privredne subjekte te da o njima informiše iranske privrednike. Stručna služba Kantonalne privredne komore Tuzla će pripremiti svu potrebnu dokumentaciju i sve potrebne informacije vezane za pomenute firme, dostaviti ih Ambasadi Irana u Sarajevu kako bi Ambasador imao potpuni uvid u situaciju u ovim privrednim subjektima i lakše došao do iranskih partnera, investicija i proširenja saradnje.

D.K.





Odrađivanje pripravničkog/volonterskog staža...

MINISTARSTVO FINANSIRA - POSLODAVCI BEZ TROŠKA

- Sastanak sa predstavnicima Ministarstva za boračka pitanja TK -

U Kantonalnoj privrednoj komori Tuzla upriličen je sastanak sa predstavnicima Ministarstva za boračka pitanja Tuzlanskog kantona. Razgovaralo se o nedavno raspisanom Javnom pozivu za učešće u II Programu sufinansiranja obavljanja pripravničkog/volonterskog staža boraca i članova njihovih porodica. Ministar Ibrahim Salihović i Džemila Zaimović sekretar u Ministarstvu, upoznali su Nedreta Kikanovića o projektu i dosadašnjim aktivnostima. Istaknuto je kako se do ovog značajnog projekta došlo na osnovu Odluke o utvrđivanju uslova, kriterija i postupka za obavljanje pripravničkog staža boraca i članova njihovih porodica i Sporazuma o realizaciji Programa o rasporedu sredstava za obavljanje pripravničkog staža boraca i članova njihovih porodica, koji su zaključili Ministarstvo za boračka pitanja Tuzlanskog kantona i JU Služba za zapošljavanje Tuzlanskog kantona. **“Na osnovu ovog Sporazuma mi smo raspisali Javi poziv sa željom da nam se javi što više predstavnika populacije koju obuhvata javni poziv a u cilju pokušaja obezbjeđenja privrednih subjekata u kojima mogu obaviti pripravnički/volonterski**



staž. Značajno je pomenuti da sve troškove snosi Ministarstvo te da su poslodavci koji odluče da se uključe u ovaj projekat, pomognu mladima iz boračke populacije, oslobođeni bilo kakvog troška”, rekao je ministar Salihović. U II Programu sufinansiranja obavljanja pripravničkog/volonterskog staža boraca i članova njihovih porodica imaju pravo učešća svi poslodavci sa područja Tuzlanskog kantona a u Budžetu TK su obezbjeđena sredstva u iznosu od 1.000.000KM. **“Ova sredstva će biti usmjerena u sufinansiranje poslodavaca, koji zakluče ugovore o obavljanju pripravničkog/volonterskog staža boraca i članova njihovih porodica sa osobama VSS a koje su na lisiti kandidata Ministarstva. Kako bi stekli potrebna iskustva i osposobljavanja a bez zasnivanja radnog odnosa, ugovori sa kandidatima bi se zaključivali na 12, 8 ili 6 mjeseci. Poslodavci će biti sufinansirani u bruto iznosu od 377,20 KM mjesečno po osobi, uz obavezu poslodavca da pripravniku/volonteru isplati 320KM neto za svaki mjesec. Raduje podatak da**

je već, samo nekoliko dana nakon objavljivanja Javnog poziva, više od 150 kandidata uspjelo dobiti mjesto za odrađivanje pripravničkog, a prijavilo ih se više od 250”, izjavila je Džemila Zaimović sekretar u Ministarstvu. Na sastanku u Komori je istaknuto da ukoliko više poslodavaca iskaže potražnju za određenim kandidatom, prioritet kod odobravanja sredstava imaju oni poslodavci koje sam kandidat prihvati. **“Ovo je jedan značajn projekat, veliki korak ka pomaganju mladima da se dodatno osposobe i steknu potrebna stručna saznanja i iskustva. Kantonalna privredna komora Tuzla daje punu podršku projektu Vlade Tuzlanskog kantona i Ministarstva za boračka pitanja Tuzlanskog kantona i učinit ćemo makimalne napore da damo svoj doprinos uspješnoj realizaciji projekta. Ono što možemo i što ćemo u najkraćem roku učiniti jeste da animiramo što veći broj poslodavaca, privrednika, privrednih subjekta koji su članice Komore, da ih upoznamo sa svim detaljima ovog projekta i da u njegovoj daljnoj realizaciji budemo veza između privrede i Vlade TK, odnosno resornog ministarstva. Da budemo servis svojim članicama ali i da olakšamo Ministarstvu aktivnosti tako što ćemo biti mjesto gdje se privrednici mogu obratiti za potrebne informacija ali i prijaviti se za odabir kadrova. Ukoliko se ukaže potreba, spremni smo organizovati i sastanak privrednika sa predstavnicima Ministarstva u cilju što efikasnijeg rada, što brže i bolje realizacije ovog izvanrednog projekta, pomoći mladima u obavljanju pripravničkog/volonterskog staža, posebno ako se ima u vidu da je riječ o populaciji boraca i članova njihovih porodica”,** rekao je Nedret Kikanović predsjednik Kantonalne privredne komore Tuzla. Sve potrebne informacije vezano za pregled zanimanja, potrebnu dokumentaciju i prijavu na Javni poziv svi zainteresovani mogu dobiti na službenoj web stranici Vlade Tuzlanskog kantona (<http://www.vladatk.kim.ba/>), te stranici Ministarstva za boračka pitanja Tuzlanskog kantona.

D.K.





„NEOPHODNE MJERE ZA SUZBIJANJE SIVE EKONOMIJE“

- Održana redovna sjednica Odbor Udruženja za trgovinu, ugostiteljstvo i turizam Kantonalne privredne komore Tuzla –

Odbor Udruženja za trgovinu, ugostiteljstvo i turizam Kantonalne privredne komore Tuzla, u proširenom je sastavu upriličio redovnu sjednicu. Analizirana je aktualna problematika u oblasti trgovine, ugostiteljstva i turizma na području Tuzlanskog kantona sa akcentom na probleme u održivosti djelatnosti, novih investicija, otvaranja novih radnih mjesta. Kao i u nekoliko prethodnih godina, a imajući u vidu poražavajuću činjenicu da je ta pojava i dalje veoma prisutna, raspravljalo se i o radu na crno u oblasti trgovine i ugostiteljstva na području Tuzlanskog kantona. Kasim Selimović predsjednik Odbora Udruženja iznio je niz podataka vezanih za aktuelni momenat oblasti trgovine na ovom području. **„Raspravljali su članovi našeg Odbora o problemima u oblasti trgovine. Kao i do sada, zajednički smo došli do određenih zaključaka i stava smo da je neophodno hitno pokrenuti aktivnosti na dosljednom sprovođenju mjera na suzbijanju sive ekonomije (rad na crno i nelegalan promet roba) kako bi se promijenilo ovako loše stanje u privredi Tuzlanskog kantona. I ovom prilikom ističemo da je potrebno skratiti proceduru trajanja privrednih sporova, da se izjednače kriteriji naplate potraživanja, odnosno da kriteriji koji se koriste za zaštitu privrednih subjekata od državnog interesa, budu isti i kada su u pitanju privrednici u privatnom sektoru. Veoma značajno za normalizovanje stanja u ovoj oblasti bilo bi uspostavljanje jednostavnijih procedura učešća na tenderima. Smatramo, a to smo i mnogo puta do sad isticali, upućivali zahtjeve, dopise i naše stavove, da se one privredne subjekte koji, kako mi to volimo reći, uredno posluju, oslobodi plaćanja taksi i drugih davanja za učešće na tenderima. Sve ovo je u cilju stimulisanja i podsticanja takvih privrednih subjekta, pa ako hoćete, na određeni način i nagrada i priznanje za uredno ispunjavanje svih zakonskih obaveza i obaveza prema državi, što nije nepoznanica u nekim zemljama okruženja. Nekoliko puta do sada smo isticali određene nepravilnosti, tražili izvještaje i opet apelujemo da se preispita slučaj raspodjele novčanih sredstava Federalnog zavoda za zapošljavanje u cilju smanjenja broja nezaposlenih. Mislimo, a i u praksi je potvrđeno, da firme koje uredno i na vrijeme plaćaju svoje obaveze prema državi, u konačnici najmanje imaju koristi od tih novčanih sredstava“**, naglasio je Kasim Selimović predsjednik Odbora.



Privrednici okupljeni u ovo komorsko Udruženje su se osvrnuli i na određene nepravilnosti koje su uočene na terenu a koje bi trebale biti u sferi i nadležnosti Kantonalnog ureda za inspeksijske poslove. **„Imamo određena saznanja da postoje nepravilnosti kada su u pitanju rad i prava određenih obrtnika. Mislimo da treba preispita pravo obrtnika, a u konkretnom slučaju se to odnosi na samostalne pekare, da li svoje proizvode smiju plasirati na dalje tržište osim u okviru svojih maloprodajnih objekata, odnosno, da li je u skladu sa propisima o obavljanju obrtničke djelatnosti da oni snabdijevanju trgovine. Mi smo se često sa ovog mjesta i iz ovog Udruženja oglašavali i po pitanju procesa fiskalizacije. Davali smo punu podršku tom procesu ali i isticali određene nepravilnosti, ukazivali na pojave koje treba promijeniti ili čak i eliminirati. I dalje smatramo da ovaj proces treba preispitati, jer se ponovo suočavamo sa situacijom da i proces fiskalizacije obuhvata one privredne subjekte koji uredno posluju i ispunjavaju svoje obaveze, a da proces nije obuhvatio baš sve i svakoga, da ima propusta i da u dobroj mjeri ima subjekta koji u potpunosti zanemaruju proces fiskalizacije, što opet direktno utiče i na punjenje Budžeta ali i nas dovodi u neravnotežan položaj i čini nas nekonkurentnim na tržištu. Tu opet pozivamo predstavnike Kantonalno ureda za inspeksijske poslove da, pored činjenice da imaju pune ruke posla, da su pretrpani brojnim zahtjevima, da čine makimalne napore da sve dovedu u red, učine dodatni napor te preispitaju, donesu nove propise te sankcionišu i zaustave obavljanje prometa u objektima bez dozvola za rad u koje, trenutno, kontrolni organi nemaju pravo vršiti bilo ikakav vid kontrole“**, prenio je utiske trgovaca i zaključke sa sastanka Odbora predsjednik Selimović. Na kraju, još jednom je iskazana potreba sastanka sa predstavnicima Vlade Tuzlanskog kantona kako bi se zajedničkim snagama pokušali riješiti navedeni problemi, otklonile nepravilnosti koje opterećavaju oblast trgovine i donose štetu i subjektima koji se bave trgovinom ali i Vladi TK.

D.K.



Iz Udruženja za poljoprivredu i prehrambenu industriju...

SJEDNICA ODBORA GRUPACIJE TOVLJAČA JUNADI TK

- - Na tržištu meso iz uvoza sumnjivog kvaliteta i po sumnjivim cijenama - -



Udruženje za poljoprivredu i prehrambenu industriju Kantonalne privredne komore Tuzla, održalo je 6. sjednicu Odbora Grupacije tovljača junadi Tuzlanskog kantona. Na sjednici je bilo riječi o uticaju podsticajne politike na smanjenje uzgoja tovljene junadi na području Tuzlanskog kantona te o administrativnim barijerama za ostvarivanje prava na novčane podsticaje za utovljenu junad na području Federacije Bosne i Hercegovine i BiH i Tuzlanskog kantona. **"Moramo istaći da je stanje u ovoj oblasti alarmantno. U odnosu na prošlu godinu, kapaciteti su popunjeni tek u procentu od 30 do 40%. Ovaj podatak ukazuje na opasnost da za godinu, eventualno dvije, na ovim prostorima neće biti mesa iz vlastite proizvodnje ako se ovaj trend nastavi. Uvoz mesa sumnjivog kvaliteta po sumnjivim cijenama direktno utiče na ovakvo stanje ali što je još gore, i na zdravlje stanovništva. Staje proizvodnja i država mora pod hitno da podrži proizvodnju domaće hrane, izdvoji sredstva koja će podržati tu proizvodnju a ne u lance koji uvoze meso iz Argentine i drugih zemalja i to mesa koje nije za konzumaciju",** rekao je Mustafa Kulić predsjednik Odbora Grupacije junadi TK. **"Puno je nagomilanih problema, administrativnih barijera, koje su godinama prisutne, godinama se ne rješavaju nego se usložnjavaju i čine situaciju na terenu sve težom. Problem je stanje na tržištu, problem je nedostatak podsticaja, problem je što nas država ovakvim odnosom tjera u kriminal. Imamo mogućnosti da proizvedemo zdravu domaću hranu ali ne uspijevamo se probiti na tržištu zbog nelojalne konkurencije i nesređenih odnosa",** rekao je član Grupacije Omer Jajić iz Donjih Vukovija.



Iz Udruženja za poljoprivredu i prehrambenu industriju

KONFERENCIJA ZA NOVINARE SAVEZA PČELARA TK

- Održan VII sajam pčelarstva "Medena Tuzla 2013" -

Savez pčelara Tuzlanskog kantona bio organizator je i VII sajma pčelarstva "Medena Tuzla 2013" koji je u Tuzli održan 20. i 21. septembra. Sajam pčelarstva "Medena Tuzla 2013" je izložbeno – prodajnog karaktera u okviru kojeg su organizovani edukativni dio za pčelare i ocjena kvaliteta izloženih medova. Članovi predsjedništva Saveza pčelara TK-a su na pres-konferenciji koja je pred početak Sajma održana u Kantonalnoj privrednoj komori Tuzla a u okviru komorskog Udruženja za poljoprivredu i prehrambenu industriju, predstavili sve aktivnosti koje su prethodile organizaciji Sajma "Medena Tuzla 2013" kao i aktivnosti u toku sajma, sam značaj ovakve manifestacije i učesnike. **"Ovo je sada već tradicionalna manifestacija i nas posebno raduje ta činjenica da smo stigli već do broja sedam. I pčelari, članovi Saveza su sretni i zadovoljni da mogu imati mjesto na kojem će kvalitetno predstaviti svoje proizvode. Također, i građanstvo je zadovoljno što na ovom mjestu sada već tradicionalno, svake godine, može pred zimske dane da se snabdije kvalitetnim medom. Posebno raduje segment ocjene kvaliteta meda. Formirana je komisija za ocjenu na čelu sa prof. Midhatom Jašićem sa Tehnološkog fakulteta Tuzla za analizu i kontrolu meda. Svaki medar koji da uzorak na ocjenu dobiće valjanu i urednu dokumentaciju. U edukativnom dijelu su organizovana dva predavanja koja su pripremili prof. Jašić i prof. dr. Tomljenović sa Tehnološkog fakulteta Zagreb. Prilika je to bila za pčelare da dođu do novih saznanja o pčelarstvu. Učesnici su bili iz Tuzlanskog kantona, Federacije BiH, Republike Srpske, Brčko Distrikta i Hrvatske",** rekao je Mahmut Bijedić predsjednik Saveza pčelara TK.

D.K.





Iz Udruženja tekstila, kože i obuće...

„BUGATTI I BURBERRY IZ KULE GRADAČAC“

- *Potreban jak partner za plasman proizvoda u Evropi* -



Tekstilna industrija u Federaciji ali i cijeloj Bosni i Hercegovini naslonjena je na evropske kupce. Prema ocjeni Munevera Novalića direktora Industrije modne konfekcije „Kula“ Gradačac, inače, člana Upravnog odbora Kantonalne privredne komore Tuzla i predsjednika Odbora komorskog Udruženja tekstila, kože i obuće, desetogodišnja recesija u kojoj se ova grana industrije nalazi, ostavila je traga ali raduju naznake oporavka. **„Sve je to relativnog karaktera. Imali smo ciklične krize, sada je svaka godina posebna, svaka nosi nešto novo, ali se ipak nadamo da su dobre procjene za naredne dvije-tri godine koje ukazuju na zadržavanje ovakvog nivoa poslovanja sa laganim poboljšanjem“**, ističe direktor Novalić.

Značajno je pomenuti da „Kula“ ima ugovore i dobru saradnju sa nekoliko značajnih kupaca iz inostranstva, kuće iz vrha evropske mode kao što su „Bugatti“ ili „Aesse“ italijanska firma koja ima „Burberry“ licencu. Firme su to koje imaju solidnu prodaju, čak bilježe i povećanje prodaje na evropskom i svjetskom tržištu. Sve to daje određenu sigurnost i stabilnost firme, naravno, uz očekivanje i daljnjeg blagog rasta proizvodnje.

„Na tržištu Bosne i Hercegovine i Hrvatske, uspijevamo plasirati vlastite kolekcije, ulazimo u franšiznu prodaju, prisutni smo u svim većim hrvatskim gradovima u većim prodajnim objektima putem naših poslovnih partnera. Tu su očekivanja da će doći do poboljšanja prodaje i da će nam to dati određene pozitivne efekte u ovoj i narednih par godina. To jeste Hrvatska, to jeste sada i Evropska unija, ali ipak, nije to klasičan primjer zemlje članice EU, oni su tu tek došli, još uvijek ima puno poteškoća i u njihovoj privredi, standardu, tržište generalno ima problema kao i u Bosni i Hercegovini. Sve to ipak, za nas predstavlja malo tržište i u Bosni i Hercegovini i u Hrvatskoj. Mi pokušavamo naći jakog partnera putem kojeg bi mogli u Evropi plasirati naše proizvode, pa neka je u pitanju i neka srednje rangirana kuća“, rekao je direktor Novalić. Planira

se u „Kuli“ Gradačac sve i na vrijeme. Slučaj je to i kada su u pitanju zaposleni. Posluje se sa optimalnim brojem radnika, prati se prirodni odliv i na vrijeme se obezbjeđuju novi kadrovi, novi obrazovani radnici koji mogu odgovoriti potrebama savremenih tokova u tekstilnoj industriji koji se prate i primjenjuju u ovoj fabrici. Svake godine upravo u tom prirodnom odlivu radnika zamijeni se pedeset do osamdeset radnika i upravo je taj podatak doveo do dobre saradnje sa gradačaćkim srednjoškolskim centrom. Dolaze svršeni učenici, prolaze neophodne procese obuke i ostaju radnici „Kule“ na obostrano zadovoljstvo. Industrija modne konfekcije „Kula“ d.o.o. Gradačac prisutna je u svijetu mode, u industriji tekstila, još od davne 1960. godine. Uz stalne napore da se napravi korak više, da se ulaže u razvoj firme, osvajaju nova tržišta, proizvodi sa znakom „Kula“ Gradačac na svjetskom tržištu se pojavljuju prvi puta još 1973. godine. Za taj period vežu se počeci saradnje sa njemačkom firmom „Brinkmann“ i generalno, ta saradnja obilježava razdoblje afirmacije i razvoja. Danas, „Kula“ predstavlja modrenu i respektabilnu fabriku na prostorima Jugoistočne Evrope sa zavidnim brojem uposlenih radnika sa zavidnom godišnjom proizvodnjom odjevnih predmeta. Tehnološki visokoopremljene proizvodne linije praćene savremenom kompjuterskom podrškom pripreme proizvodnje i krojenja, sa obučenicima i iskusnim uposlenicima, kadrovski osposobljena i sa jasnom poslovnom orijentacijom i definisanom poslovnom politikom, „Kula“ se nalazi na stalnom putu prilagođavanja zahtjevima tržišta i razvoja svoje konkurentske sposobnosti na njemu. U većini gradova Bosne i Hercegovina razvijena je mreža maloprodajnih objekata „Kule“. Čest je gost samova mode, modeli su izlagani u u Bruxellesu, Leipzigu, Düsseldorfu i Brnu. Krajem 2007. godine „Kula“ je postala licencirani GORE-TEX proizvođač, a 2008. godine službeno je dobila certifikat međunarodnog ISO standarda 9001:2000. Izvršena je recertifikacija međunarodnog ISO standarda u 9001:2008.

D.K.



Iz Vlade Tuzlanskog kantona...

„TURSKE INVESTICIJE SU DOBRODOŠLE“

- *Sisecam zadovoljan Vladom TK -*

„Aktivnosti Vlade Tuzlanskog kantona i Rudnika soli Tuzla daju nam sigurnost za realizaciju naših planova i novih investicija“ istakao je na sastanku u Ministarstvu industrije, energetike i rudarstva TK Sabahattin Günceler, Predsjednik hemijske grupe Sisecama. Delegacija Sode Sisecam danas je čestitala, te izrazila svoje zadovoljstvo i zahvalnost Rudniku i Vladi povodom otvaranja novih bušotina na Tetimi, a time i povećanju kapaciteta Rudnika. Samo u protekle dvije godine Vlada Tuzlanskog kantona i resorno ministarstvo su za realizaciju novih istražno – eksploatacionih bušotina na Tetimi izdvojili oko 800.000,00 KM, čime je, između ostalog, povećan kapacitet Rudnika i stvoreni preduslovi za ostvarivanje planova i povećanje proizvodnih kapaciteta fabrike sode u Lukavcu. **„Soda Sisecam i turske investicije su dobrodošle. Cijenimo da preko Sode, rudnika krečnjaka „Vijenac“ i Rudnika soli Tuzla imamo veoma dobru saradnju i Vlada Tuzlanskog kantona će učiniti sve što je u našoj moći da Soda dobije potrebne količine slanice“** rekao je u svom obraćanju turskoj delegaciji ministar industrije, energetike i rudarstva Željko Knežiček. Ovom prilikom razgovaralo se i planovima Fabrike u narednom periodu i dinamici buduće saradnje i zajedničkog razvoja, a konačni cilj jeste da Soda Sisecam bude najveći proizvođač sode u ovom dijelu Evrope. **„Zadovoljstvo nam je što u našem okruženju imamo kompaniju sa ozbiljnim razvojnim projektima koja je uspostavila dobru sardnju, kako sa svojim poslovnim partnerima, tako i sa lokalnom zajednicom i organima vlasti u Tuzlanskom kantonu“** riječi su premijera Tuzlanskog kantona Seada Čauševića, koji je također prisustvovao današnjem sastanku. Osim premijera Čauševića, ministra Knežičeka i predsjednika Güncelera, sastanku su prisustvovali pomoćnik predsjednika hemijske grupe Sisecama za proizvodnju Hidayet Özdemir, generalni direktor Sode Sisecam Umut Baris Donmez i direktor rudnika soli Tuzla Amir Sušić, saopćeno je i z Odjeljenja za informisanje Vlade Tuzlanskog kantona

USAID POSJETIO TUZLANSKI KANTON

- *Otvaranje Studentskog energetskog kluba u Tuzli -*



Nastavak aktivnosti na području Tuzlanskog kantona u godini energetske efikasnosti bio je fokusu razgovora premijera TK, Seada Čauševića i predstavnika Američke agencije za međunarodni razvoj. Sastanku su prisustvovali dr. Zoran Morvaj, direktor Projekta 3E, Mak Kamenica, zamjenik direktora, Anika Gavrilović i Jasna Hivziefendić, savjetnica premijera za međunarodnu saradnju i razvojne programe. Otvaranje Studentskog energetskog kluba u Tuzli kao i info-centara u svih 13 općina dio je aktivnosti koje USAID poduzima u cilju sklapanja energetske slike Tuzlanskog kantona, rečeno je ovom prilikom. USAID-ov projekat Ekonomija energetske efikasnosti 3E je program vrijedan 4,2 miliona dolara za promociju tehnologija energetske efikasnosti i to putem razvoja pilot projekata u objektima sufinansiranim od strane javnog i privatnog sektora. Cilj projekta 3E da u praksi prikaže kako energetska efikasnost štedi novac potrošačima već je dao bolje rezultate nego što se očekivalo. Budući da je jedna od aktivnosti u predstojećem periodu i takozvano „utopljanje“ privatnih stambenih objekata bilo je govora i o mogućnostima saradnje javnog i privatnog sektora. U narednom periodu USAID će uraditi investicijske studije koje će, između ostalog, provesti u općinama Kladanj, Srebrenik i Lukavac što će u konačnici uštedjeti novac potrošačima i imati veliki ekološki efekat. Premijer Čaušević goste je upoznao i sa predstojećim planovima toplifikacije nekih od općina, uvođenjem informacionog sistema u neke od javnih objekata te podržao mogućnost poticajnih sredstava i podrške građanima slabijeg imovnog stanja za toplinsku izolaciju domaćinstava. Predstavnici USAID-a ovom su prilikom premijeru Čauševiću uručili i potpisanu Energetsku povelju, saopćeno je iz Odjeljenja za informisanje Vlade Tuzlanskog kantona.





Sajamske aktivnosti...

PRIVREDA TK NA SAJMOVIMA U BIH

- *Organizovan zajednički nastup na sajmovima u Gradačcu, Bihaću, Bijeljini, pripreme za Zenicu i Brčko...*

Kantonalna privredna komora Tuzla je u kratkom periodu organizovala predstavljanje privrede Tuzlanskog kantona na nekoliko značajnih sajmских manifestacija. Nastupi su zabilježeni u okviru zajedničke postavke koju u cilju racionalizacije, te podizanja stepena konkurentnosti i koordinacije zajedničkih nastupa komora, jedinstvenog nastupa komorskog sistema, smanjenja troškova te ostvarivanje kvalitetnijih privrednih kontakata na sajmovima unutar zemlje, organizuje Vanjskotrgovinska/spoljnotrgovinska komora Bosne i Hercegovine. Uz organizatora i nosioca aktivnosti VTK/STK BiH, priliku da predstave privredne subjekte imali su Privredna/Gospodarska komora Federacije BiH, Privredna komora Republike Srpske, Privredna komora Brčko Distrikta.

➤ PRIVREDA TK NA SAJMU U GRADAČČU

U okviru pomenute zajedničke postavke, "Privreda TK" je bila predstavljena na 40. jubilarnom Međunarodnom sajmu poljoprivrede i prehrambene industrije – Sajam šljive u Gradačcu, na kojem se predstavilo više od 280 izlagača iz Hrvatske, Srbije, Italije, Turske i Bosne i Hercegovine. **"Ovogodišnji jubilarni sajam u Gradačcu je ispunio sva očekivanja. Zahvaljujući našim izlagačima, sponzorima i posjetiocima, ova najstarija specijalizovana sajska manifestacija u BiH je nastavila svoju tradiciju. Tradiciju je teško očuvati, ali mi smo uspjeli u tome. Posebno u ovo teško vrijeme privređivanja, kada se mnoge firme ne odlučuju za ovu vrstu promocije, ovaj sajam je za brojne izlagače i dalje privlačan, te je još jednom potvrdio da je reprezentativan privredno-kulturni događaj. Želja nam je da Međunarodni sajam poljoprivrede i prehrambene industrije – Sajam šljive i zvanično bude ono što danas jeste, a to je jedinstveni jesenski sajam poljoprivrede u BiH. To je obaveza nas organizatora, ali i svih nivoa vlasti u BiH, kako bismo očuvali i prezentovali domaću proizvodnju i dostignuća u proizvodnji i preradi hrane"**, rekao je direktor Gradačačkog sajma Husein Topčagić. Sajam je posjetio veliki broj građana, kako iz Gradačca, tako i iz drugih gradova BiH, kao i poslovnih ljudi iz regije. U četiri dana sajma, posjetioci su mogli vidjeti prezentacije najnovijih proizvoda i usluga iz oblasti proizvodnje i prerade, hrane i pića, poljoprivredne mehanizacije i zaštitnih sredstava. Na sajmu su se predstavile i brojne organizacije i institucije koje podržavaju agrar u BiH, poput Federalnog ministarstva poljoprivrede, vodoprivrede i šumarstva, privrednih komora, te udruženja poljoprivrednih proizvođača, kao i poljoprivrednih zadruga, bankarskih institucija i nevladinih organizacija. Ovogodišnji sajam obilježio je niz kolektivnih izložbi, poput privrede Kantona Sarajevo, Brčko Distrikta i općine Gračanica. Kako je saopćio organizator, na ovogodišnjem sajmu istaknuti su problemi u oblasti poljoprivrednog sektora u BiH, posebno voćarstva, te proizvodnje i plasmana tržišnih viškova. Sa tradicionalnog stručno-naučnog savjetovanja poručeno je da je potrebno udruživanje poljoprivrednih proizvođača i njihovih udruženja, kako bi bili jedinstveni u smislu boldiranja i adresiranja, s ciljem rješavanja problema. U povodu jubileja 40. Sajma šljive dodijeljene su medalje za kvalitet izloženih proizvoda, a uručeno je i 40 priznanja za učešće, afirmaciju i promociju sajma. Izložbene prostore posjetio je veliki broj zvaničnih delegacija javnog, društvenog i političkog života u BiH. Sajam su zajednički otvorili Premijer Vlade FBiH Nermin Nikšić, visoki predstavnik za BiH Valentin Incko i Federalni dopremijer i ministar poljoprivrede, vodoprivrede i šumarstva Jerko Ivanković-Lijanović. Svojim dolaskom podršku ovom sajmu dao je i bivši predsjednik Republike Hrvatske Stjepan Mesić. Na Kuli Zmaja od Bosne, prijem za zvanice Sajma šljive upriličio je općinski načelnik Edis Dervišagić.





➤ PRIVREDA TK NA 11. MEĐUNARODNOM EKOLOŠKOM SAJMU "EKOBIS 2013"

11. međunarodni ekološki sajam
11th international ecology fair



Bihać,
Bosna i Hercegovina
12-15.09.2013.



U Bihaću je od 12. Do 15. Septembra održan 11. Međunarodni ekološki sajam "EKOBIS 2013". Sajam su otvorili Emdžad Galijašević, Općinski načelnik Bihaća, Ismet Pašalić, predsjednik Privredne komore USK-a, Branka Đurić, ministrica okoliša i turizma F BiH, Safet Harbinja, direktor Fonda za zaštitu okoliša i Amir Džajić, ministar poljoprivrede USK-a. Na oko 10.000 m2 otvorenog i zatvorenog izložbenog prostora na Gradskoj otoci se predstavilo oko 280 izlagača iz BiH i 15 zemalja. "EKOBIS 2013" je sadržajem i pratećim događajima bio posvećen zaštićenim područjima. S tim u vezi, u okviru pratećih sadržaja sajma, održana je međunarodna konferencija o prekograničnoj suradnji "Održivi razvoj u

zaštićenim područjima". Po prvi put na ovom sajmu, zajedno sa Nacionalnim parkom "Una" izlagali su i Dinaric Arc Parks - Parks Dinarides tj. Parkovi Dinaridi - Parkovi Dinarskog luka, kojima se stvara mreža zaštićenih područja od Slovenije do Albanije. **"Raduje činjenica da je na sajmu učestvovalo devet županijskih komora iz Hrvatske, tri komore iz Srbije, Trenčinska regionalna komora iz Slovačke, Vanjskotrgovinska/Spoljnotrgovinska komora BiH, Privredna komora F BiH, Privredna komora Republike Srpske, komore iz RS-a, te Privredna komora Kantona Sarajevo. Sajam je ove godine prvi put imao izlagače iz Indonezije i Kine, te ponovo izlagače iz Mađarske. Sudjelovanje čak 21 komore iz regije samo potvrđuje strateško opredjeljenje Privredne komore USK-a i sajma EKOBIS za jačim regionalnim povezivanjem. Hvala svima koji su pomogli održavanje 11. EKOBIS- a , jer su na taj način pomogli održavanje jedinstvenog sajma u ovom dijelu BiH i regiona"**, istakao Ismet Pašalić, predsjednik Privredne komore USK-a Bihać, organizatora sajma. I ove godine su na sajmu nagrađeni najuspješniji izlagači. Na tradicionalnoj poslovno-zabavnoj večeri pod nazivom "Smaragdna noć", dodijeljene su nagrade Privredne komore Unsko-sanskog kantona (USK) najuspješnijim privrednicima u prošloj i najuspješnijim izlagačima Sajma u ovoj godini. Kada su u pitanju nagrade za 2012. zahvalnice su dobili bihaćki Vodovod i Šumsko-privredno društvo (SPD) "Unsko-sanske šume" iz Bosanske Krupe. Plaketu za najuspješnije mikro privredno društvo dobilo je krupsko poduzeće „Ekamant Bosna“, za malo Javno poduzeće (JP) Nacionalni park Una, srednje bihaćki "Sani global" i veliko "Tuš-trade" također iz Bihaća, dok je plaketu za najuspješniju finansijsku instituciju dobila Glavna filijala Raiffeisen Bank BiH u Bihaću. Nagrada Grb komore dodijeljena je Javnom komunalnom poduzeću (JKP) Vodovod i knalaizacija iz Velike Kladuše, a zlatnu medalju za poduzetnički poduhvat godine dobilo je bihaćko poduzeće "Č.J.". Specijalno priznanje Komora je za uspješan desetogodišnji rad i razvoj mljekarstva u BiH dodijelila bihaćkoj Mljekari Meggle. Meggle je ujedno i među nagrađenim najuspješnijim ovogodišnjim izlagačima na Sajmu. Dobitnik je plakete za kvalitet živežnih namirnica za kiselo vrhnje s jogurtom, koje je dobila i Medena iz Virovitice, u vlasništvu Slavka Švrake, za dva proizvoda:





bagremov i med Amorfa. Plaketu za kvalitet stočne hrane dobilo je poduzeće Mix iz Orašja za starter za brojlere. Priznanje za najbolju turističku ponudu dobilo je eko selo „Natura art“ Opal grupe iz Bihaća, a za najbolju eko aktivnost Ministarstvo za građenje prostorno uređenje i zaštitu okoliša USK-a. Najbolje uređenim štandom proglašen je onaj cazinskog poduzeća Kenda commerce, dok je najbolje uređen vanjski izložbeni prostor ŠPD „Unsko-sanske šume“. Priznanje za paletu ekoloških proizvoda dobilo je poduzeće Organsko Vuković iz Bihaća. Za sveukupan dojam izlaganja nagrađeno je JP nacionalni park Una, a za najuspješniji kolektivni nastup Hrvatska gospodarska komora (HGK) Županijska komora Virovitica.

Posebna priznanja za podršku Sajmu dodijeljena su: Vladi USK-a, Općini Bihać, Fondu za zaštitu okoliša FBiH, Federalnom ministarstvu okoliša i turizma, Vanjskotrgovinskoj komori BiH, Privrednoj komori FBiH, Agenciji za vodno područje rijeke Save, Agenciji bodyguard Fileković i Promet tehnu iz Bihaća. Posebno priznanja dobio je bihaćki Grafičar, a specijalno priznanje Ambasada Republike Indonezije u BiH za podršku Sajmu kroz ponudu u trgovinskim i investicijskim projektima. Treba istaći da je organizator, priredio niz edukacijskih programa. Održani su okrugli stolovi, stručni skupovi, prezentacije i promocije firmi, proizvoda i projekata, poslovni susreti privrednika, ekološke akcije, dječje ekološke radionice, gastro-festival, kulturno-umjetnički i sportsko-rekreacijski i zabavni sadržaji. Organizaciju ovogodišnjeg sajma podržali su Općina Bihać, Vlada Unsko-sanskog kantona, Fond za zaštitu okoliša F BiH, Federalno ministarstvo okoliša i turizma, Ministarstvo vanjske trgovine i ekonomskih odnosa BiH, Vanjskotrgovinska komora BiH, Privredna komora F BiH, Agencija za vodno područje rijeke Save, te USAID FIRMA Projekt BiH.

➤ "PRIVREDA TK" NA SAJMU INTERAGRO 2013 U BIJELJINI

Ovogodišnji 12. Međunarodni poljoprivredni sajam "Interagro 2013" održan je 18. do 21. septembra na Agrotržnom centru "Knez Ivo od Semberije" u Bijeljini. Ova sajamska manifestacija održala se na 6.000 kvadratnih metara izložbenog prostora, na kojima je svoje proizvode predstavilo 120 izlagača sa prepoznatljivim robnim markama i stručnjaci iz regiona, iz Njemačke, Češke, Austrije, Italije, Srbije, Federacije BiH i Republike Srpske. Ovo je 13. Poljoprivredni sajam u Bijeljini, a ove godine manifestacija je prvi puta imala i partnera,

bila je to Privredna komora Vojvodine. Organizator sajma je preduzeće „Grad“ Bijeljina, pokrovitelji su Ministarstvo poljoprivrede, šumarstva i vodoprivrede Republike Srpske, Ministarstvo spoljne trgovine i ekonomskih odnosa BiH i grad Bijeljina. "Privreda TK" predstavljena je i na ovoj sajamskoj manifestaciji.





➤ **20. GENERALNI BH SAJAM "ZEPS" OD 1. DO 5.10. U ZENICI**

20. Generalni BH sajam "Zeps" biće održan od 1. do 5. oktobra 2013 godine u Zenici. Riječ je o općem sajmu koji predstavlja mjesto za prezentaciju firmi iz više privrednih grana, te kolektivne izložbe država, regija, općina, udruženja. Sajam je koncipiran po cjelinama – sajamskim blokovima (skraćeno SB), kojih ima 12. Svaki sajamski blok je tako izložba određene oblasti i proizvodne grane, nukleus budućeg specijaliziranog sajma u koji vremenom prerasta, kao što je blok metala prije devet godina prerastao u Međunarodni sajam metala ZEPS INTERMETAL. "Zeps" je međunarodni sajam na kojem je, na svih dosad održanih



19 sajmova, odnos domaćih i stranih izlagača 55% : 45%. ZEPS je najveći sajam u Bosni i Hercegovini, a njegovi učesnici vrlo su zadovoljni rezultatima koje ovdje ostvaruju. Dobra poslovna posjeta sajmu omogućava izlagačima brojne neposredne kontakte, koji su rezultirali velikim brojem zaključenih i realizovanih uspješnih projekata i poslova. Karakteristika sajma su, takođe, kolektivne izložbe: zemalja, regija, općina, udruženja... Poslovnoj, ali i široj javnosti svakako je posebno interesantna izložba ZEMLJA-PARTNER. Dosad su taj sajamski status ovdje imale Slovenija, Hrvatska, Mađarska, Srbija i Crna Gora, Češka i Crna Gora. Na dosadašnjih 19 generalnih bh sajmova ZEPS učestvovalo je 9.413 izlagača, a obišlo ih je 1,275.995 posjetilaca.

➤ **11. SAJAM PRIVREDE "BRČKO 2013" POLOVINOM NOVEMBRA**

Međunarodni sajam privrede "Brčko 2013" biće održan od 14. do 17. novembra u prostoru brčanske Luke, potvrdio je predsjednik Privredne komore Brčko distrikta Miroslav Pančić. Pančić je na konferenciji za novinare rekao da će se 12. Sajam održati u adaptiranom prostoru brčanske "Luke", a da je ugovor o zakupu sa njenim menadžmentom već potpisan. "Izlagači će biti raspoređeni na 5.000 metara kvadratnih otvorenog i 3.000 metara kvadratnih zatvorenog prostora. Prošle godine smo tamo organizovali sajam i tvrdim da bez izgradnje



novog prostora ne možemo imati bolji od ovoga", istakao je za portal indikator.ba Pančić. Sekretar ove asocijacije Nenad Vuković napomenuo je da će Privredna komora, kao organizator, nastojati u narednom periodu da brendira ovu sajamsku manifestaciju i da je podigne na viši nivo. "Ovogodišnji sajam će poslužiti kao najava mogućnosti da u idućoj godini održimo prvi regionalni međunarodni sajam lučkih gradova", precizirao je Vuković. Na ovogodišnjem Sajmu privrede očekuje se oko 200 učesnika. Pokrovitelj je Vlada Brčko distrikta, koja je za ove namjene obezbijedila 90.000 maraka.

Svečano u "Solani" Tuzla...

OBILJEŽEN DAN SOLARA I 128 GODINA SOLANE

- U rad pušten moderni stroj za pakiranje vrijedan 5,5 miliona KM -



U "Solani" dd Tuzla bilo je svečano. Organizovan je "Dan otvorenih vrata" u kojem je obilježen "Dan solara", 128. godišnjica firme i pušteno u rad moderno postrojenje za pakovanje. Vrijednost novog pogona je 5,5 miliona KM. Kako je istaknuto na svečanosti, ovim pogonom Fabrika soli stvara bolje uslove za nastup na svjetskom tržištu a ujedno, predstavlja i jedan od najvažnijih koraka ka ispunjavanju uslova koje propisuje EU. Preduslov je to svkako i za nove planove, nove investicije u bliskoj budućnosti.

"Uspjeli smo uglavnom vlastitim sredstvima i jednim dijelom uz pomoć banaka, obezbijediti investiciju od 5,5 miliona KM. Ovo novo, najsavremenije postrojenje predstavlja temelj budućnosti i otvara mogućnosti da završimo projekat nove Solane. Ujedno, mi trenutno izvozimo više od 80% svoje proizvodnje. Imajući u vidu da nam je cilj postati regionalni lider u proizvodnji soli, ovaj pogon predstavlja i korak više ka ostvarenju tog cilja. Predstavlja

tehološki vrh koji će nam omogućiti da imamo i kvalitetnije proizvode, povoljni uslove za rad i ovim pogonom mi završavamo diop akovanja za narednih desetak godina", izjavio je Izudin Kapetanović, direktor Fabrike soli Tuzla.

Staro postrojenje koje je u pakovanju soli bilo aktivno 40 godina, u istom pogonu na istom mjestu, tik uz novo, danas predstavlja eksponat o svjedoči pisanju nove istorije Solane Tuzla.

"Novo postojenje za pakovanje u značajnoj mjeri povećava kapacitet kilogramskog pakovanja za domaćinstva, a robotizirani stroj značajno humanizira rad radnika, jer omogućava neuporedivo lakše hiljadukilogramsko industrijsko pakovanje. Uz to novi strojevi u potpunosti otklanjaju mogućnost onečišćenja. Robotizirana mašina je jedna od tehnološki najnaprednijih na svjetskom tržištu i namjenski



je priozvedena za pakovanje soli. Sa aspekta kvaliteta upotpunjava zahtjeve naših kupaca za kvalitetom i ujedno je u skladu svih standarda i certifikata koje mi u Solani posjedujemo, koje smo implementirali", rekla je Amira Brkić, rukovodilac Sektora upravljanja kvalitetom.

Zadovoljstvo je bilo pristuno i kod predstavnika Vlade Tuzlanskog kantona.

Kako je istaknuto na svečanosti, "Solana" dd Tuzla predstavlja jedan od rijetkih privrednih subjekata u kojem se u vrijeme svjetske ekonomske krize uspjelo sačuvati sva radna mjesta uz povećanje proizvodnog kapaciteta. Podrška "Solani" u ostvarivanju planova za naredni period, obećana je iz Općine Tuzla i Vlade Tuzlanskog kantona. Svečanosti su prisustvovali brojni partneri "Solane" iz Tuzlanskog kantona, Bosne i Hercegovine, zemalja regiona, predstavnici općinske i kantonalne vlasti, sadašnji i bivši solari.

D.K.





Obilježen značajan jubilej...

30 GODINA DALJINSKOG GRIJANJA TUZLA

- Jubilej obilježen konferencijom za novinare, okruglim stolom i Svečanom akademijom –



JKP "Centralno grijanje" dd Tuzla upriličilo je niz aktivnosti u povodu obilježavanja značajnog jubileja, 30 godina sistema daljinskog grijanja Tuzla. Jubilej obilježen konferencijom za novinare, okruglim stolom i Svečanom akademijom. Sve su to bile prilike da se istaknu osnovni podaci vezani za početke rada ovog preduzeća, za kontinuiran rast i razvoju firme, za detalje iz 1955. godine kada je počela toplifikacija Tuzle građenjem kućnih kotlovnica. Uz ovaj jubilej, Nevres Arnautović, generalni direktor JKP "Centralno grijanje" dd Tuzla je govorio o trenutnim ciljevima i aktivnostima preduzeća, a najavio je značajne projekte toplifikacije za naredni period.

"U periodu od 1979. do 1983. godine realiziran je program toplifikacije grada Tuzla sa izvorom toplinske energije u Termoelektrani Tuzla i distribucijom vrelе vode do grada. Krajem septembra 1983. godine u rad je pušten sistem daljinskog grijanja, sa izgrađenom izmjenjivačkom stanicom u Termoelektrani Tuzla kapaciteta 174 MW, magistralnim vrelovodom ukupne dužine 9.800 m i sa 16 novih izmjenjivačkih toplinskih podstanica u naselju Sjenjak", istkao je direktor Arnautović na druženju sa novinarima. Konferenciji je prisustvovao i Aid Berbić, šef Službe za komunalne poslove Općine Tuzla koji je istakao kako je Tuzla trenutno jedna od najbezbednijih općina u smislu sistema grijanja i istakao da u ovih 30 godina nije bilo sezone bez grijanja. **"Danas je Tuzla grad sa najvećim sistemom daljinskog grijanja u BiH, ujedno i jedan od najvećih u jugoistočnoj Europi na bazi kogeneracije. Trenutno priključena toplinska snaga iznosi 220 MW u instalaciji grijanja. Na sistemu je ukupno 847 toplinskih podstanica i 132 kilometra vrelovodne mreže. Toplinskom energijom se snabdijeva 21.026 korisnika i zagrijava ukupno 1.550.000,00 m2 površine. Plan je da se mreža održava što kvalitetnije i širi prema novim korisnicima. Program toplifikacije grada Tuzle značio je i poboljšanje ekoloških uslova življenja, bolji urbani standard, racionalnije korištenje energije, kvalitet i sigurnost",** istakao je Berbić.

Na skupovima organizovanim u povodu značajnog jubileja, istaknuto je da je, uzimajući u obzir analizu sistema daljinskog grijanja – izvor toplinske energije, Nacrt Prostornog plana Općine Tuzla do 2026. godine, kao i pretpostavke rezultata koji će se dobiti implementacijom planiranih mjera i aktivnosti na optimizaciji daljinskog grijanja, moguće dati koncept proširenja postojećih zona toplifikacije. Ovakvim proširenjem bi se postojećih 39 zona povećalo na 55, s tim da je za novih 16 zona predviđeno dalje širenje.

Održavan je i okrugli sto pod nazivom "Daljinsko grijanje u BiH danas i sutra" a sve je ujedno bilo prilika da se najavi i početak nove sezone grijanja. **"Svi tehnički uslovi su ispunjeni za početak nove sezone grijanja. Od 1. oktobra svi građani koji su priključeni na sistem daljinskog grijanja mogu očekivati tople radijatore, jer se u tom periodu provodi hladno-tlačna proba. Privode se kraju remontni radovi na sistemu daljinskog grijanja",** rekao je Hajrudin Hodžić, tehnički direktor JKP "Centralno grijanje" dd Tuzla. I Svečana akademija je bila prilika za sumiranje rezultata rada u prethodnom periodu te prezentiranje planova za budućnost. Na akademiji su uz Nevresa Arnautovića direktora JKP „Centralno grijanje" dd Tuzla, govorili i Izet Džananović direktor Termoelektrane Tuzla i Jasmin Imamović načelnik Općine Tuzla. Zaslužnim pojedincima su uručena priznanja. RTV7 izvršni producent manifestacija kojima se obilježava ovaj značajan datum za Tuzlu, priredio je i film o Centralnom grijanju dd Tuzla, o početku toplifikacije Tuzle.

D.K.



Nastup na 11. Belgrade Beer fest

"TUZLAK" U BEOGRADU

- Tuzlanski pivari ostavili bez daha Beograđane -

Tuzlanska pivara zabilježila je izuzetno uspješan nastup na 11. Belgrade Beer fest-u, koji je sredinom avgusta u organizaciji Beogradske kulturne mreže, na Ušću okupio najbolje evropske i svjetske pivarske kuće. Radi se o najvećem feestivalu piva u Jugoistočnoj Evropi, koji je u posljednjoj deceniji posjetilo više od 5,5 miliona posjetilaca. Festival je praćen brojnim kulturnim i zabavnim sadržajima, a na njemu je ove godine predstavljeno pedeset pivskih brendova iz cijeloga svijeta. Tuzlanski pivari dobili su poziv da budu u društvu najboljih, jer su „pivara sa dugogodišnjom tradicijom i proizvodima visokog kvaliteta, proizvedenim po staroj recepturi na prirodan način“. Prema riječima Zlatana Pejića, direktora Tuzlanske pivare, odlazak na Sajam u Beogradu uslijedio je nakon zvaničnog poziva da se predstavi tradicionalna proizvodnja kakva se još održala samo u rijetkim tvornicama piva na Balkanu: **„Sa zadovoljstvom smo prihvatili poziv i predstavljanje naših proizvoda istočnim susjedima. Uvjerem sam da će naša kvaliteta biti prepoznata i da ćemo tuzlansko pivo vratiti na ovo tržište. Istovremeno, zadržavamo izuzetno visoku poziciju na bosanskohercegovačkom tržištu, istrajavajući na održavanju kvalitete kakvu naši konzumenti prepoznaju još od 1884. Godine**“, kazao je direktor Pejić.

Brojnim gostima 11. Belgrade Beer fest-a Tuzlanska pivara se predstavila brendom Tuzlanski pilsner, pokazavši da su očekivanja organizatora nadmašena,



te zadržan nivo nastupa kakav i zaslužuje pivo koje se zadnje dvije godine nalazi u Top 10 evropskih piva. Podsjetimo, Tuzlanska pivara je jedina u Bosni i Hercegovini koja je posljednjih nekoliko godina, u vrijeme teške ekonomske krize, zabilježila značajan porast proizvodnje i prodaje. Samo u prošloj godini taj rast je dostigao skoro deset posto u odnosu na prethodnu godinu. Pored brenda Tuzlanski pilsner, na tržište je lansirano pivo Erster sa njemačkom tehnologijom koje karakteriše nešto gorči okusom, što je ovome proizvodu osiguralo izvrstan plasman, čime su se stvorili uslovi za uvođenje i niza novih proizvoda. Poseban hit bila je pojava Premium crnog piva, a potom i Premium radlera, sa okusom limuna i grejpa. Ova dva proizvoda oborila su sve moguće rekorde prodaje. Uvedena je linija proizvodnje sokova, a brend Ledena pozicionirao se veoma visoko na rang-listi po kvaliteti i prodaji. Rad na marketingu i dizajnu ambalaže proteklih godina skrenuo je pažnju ne samo domaćih konzumenata, već i širom svijeta gdje se proizvodi tuzlanske pivare danas plasiraju. Očuvani principi stare pivarske tradicije spojeni sa novim tehnologijama i dizajnom, Tuzlanskoj pivari otvorili su put ka evropskom tržištu. Upravo je takav odnos prema konzumentima na štand Tuzlanske pivare privukao veliki broj gostiju, tako da je pilsner bio svojevrsan hit 11. Belgrade Beer fest-a. Tuzlanska pivara je nastupajući u Beogradu, u saradnji sa Općinom Tuzla predstavila turističke i ekonomske potencijale ovoga grada, prije svega Panonska jezera, te bogatu solarsku i pivarsku tradiciju. S obzirom da je dnevna posjeta Sajmu prelazila 100.000 ljudi, ova promocija se pokazala veoma uspješnom i značajnom, te skrenula pažnju na turizam i kvalitetne pivarske proizvode koje Tuzla nudi. Posebno veliko interesovanje gosti štanda Tuzlanske pivare iskazali su za Pivnicu Taverna, nefiltrirana piva i gurmanske specijalitete koje ona nudi, tako da će uskoro uslijediti pregovori o mogućim turističkim posjetama Beograđana Tuzli i Tuzlanskoj pivari. U nastupu na 11. Belgrade Beer fest, saopćila je BMG, veliku podršku pružila je kompanija Ball Packaging Europe Belgrade.





Novo bezalkoholno piće na tržištu

"REFRESH" IZ "PIVARE" TUZLA

- Pivara dd Tuzla - razvojnim projektima protiv recesije -



Paleta osvježavajućih napitaka kompanije Pivara d.d. Tuzla ovih dana je bogatija za novi brend - Refresh. Radi se o osvježavajućem, bezalkoholnom, gaziranom piću sa okusom kiwana koje je na tržište Bosne i Hercegovine lansirano u ugostiteljskom pakovanju od 0,25 litara – staklena boca, te u plastičnoj tzv. PET ambalaži od 0,5 i 1,5 litara. Refresh je proizvod u potpunosti osmišljen i kreiran od strane inženjera Pivara d.d. Tuzla, a rezultat je potrebe i zahtjeva tržišta. S obzirom da je ova kompanija posljednjih godina zauzela primat na široj tuzlanskoj regiji i sigurno svoju tržišnu dominaciju širi Bosnom i Hercegovinom, novi proizvodi samo upotpunjuju njenu ponudu, zadovoljavajući u potpunosti potrebe i želje konzumenata. **"Brend osvježavajućih bezalkoholnih pića Ledena, izuzetnom prodajom i tražnjom, posljednjih godina je pokazao kako konzumenti vjeruju u kvalitet koji nudi Pivara d.d. Tuzla. Premašili smo sva očekivanja, ali smo se susreli i sa jasno definisanim zahtjevima tržišta, da ponudimo nove proizvode i da na takav način održimo korak sa svijetom. Vođeni takvim zahtjevima proizveli smo Refresh, osvježavajuće, gazirano piće sa prirodnom aromom, bez vještačkih sladila"**, kazao je Zlatan Pejić, direktor Pivara d.d. Tuzla. Prema njegovim riječima, napitak Refresh već je na tržištu prisutan od 20. avgusta 2013. godine. Menadžment kompanije Pivara d.d. Tuzla je proteklih nekoliko godina, odgovarajući na ekonomsku krizu, koja je u zemlji i

svijetu ostavila teške posljedice, zauzela stav da će na takvu situaciju odgovoriti intenzivnim razvojem i prosperitetom. Umjesto reduciranja radnih mjesta i smanjenja proizvodnje, krenulo se u investicije, modernizaciju prostrojenja, uvođenje novih proizvoda, osmišljavanje atraktivnog dizajna proizvoda i drugačiji pristup tržištu. Takva politika osigurala je veću prodaju i otvorila mogućnost za dalji razvoj. Brend Refresh, kao rezultat takve poslovne politike samo je potvrda da je politika razvoja uspješan koncept od kojega u kompaniji Pivara d.d. Tuzla ni ubuduće neće odstupiti, saopćila je Bosanska medijska grupa.

• Zlatne medalje Pivari Tuzla na jubilarom 45. sajmu u Gradačcu

Međunarodni sajam poljoprivrede i prehrambene industrije - Sajam šljive održao se od 28. do 31. avgusta 2013. godine u Gradačcu. Sajam je bio prilika za poljoprivredne proizvođače i prerađivače hrane i pića da predstave prednosti i dostignuća u ovoj privrednoj grani. Najstarija specijalizovana sajamka manifestacija u Bosni i Hercegovini ove godine obilježila je 45 godina svog postojanja i ove godine je Pivara Tuzla imala čast da pored tradicionalnog izlaganja osvoji dvije zlatne medalje, za proizvode Tuzlanski pilsner i Refresh Kiwano. Na sajmu je bilo i prisutno oko 280 izlagača iz BiH, zemalja regiona, Turske i Njemačke.



Održan privredni susret u Komori

UPOZNAVANJE SA NOVIM DOSTIGNUĆIMA U RAZVOJU MJERNE OPREME

- Primjena specijalističke mjerne opreme za ispitivanje građevinskih konstrukcija i konstruktivnih elemenata -



Kantonalna privredna komora Tuzla u saradnji sa firmom „Vatrostalac“ d.o.o. Tuzla organizovala je poslovni susret na temu: Primjena specijalističke mjerne opreme za ispitivanje građevinskih konstrukcija i konstruktivnih elemenata. „Vatrostalac“ d.o.o. Tuzla je preduzeće specijalizovano za projektovanje, izgradnju, sanaciju i održavanje industrijskih objekata, dimnjaka, hladnjaka, silosa, tornjeva i toplotnih postrojenja, te radove na visinama, a ovlaštenu firmu „Tractel“ za opremu za rad na visini. Početkom ove godine djelatnost firme je proširena i na područje ispitivanja svih tipova konstrukcija i konstruktivnih elemenata probnim statičkim i dinamičkim opterećenjima (mostovi, sportske tribine, krovni nosači, kranke grede, temeljne konstrukcije mašinske opreme koja izaziva vibracije, industrijski dimnjaci, silosi, rezervoari, svi tipovi objekata visokogradnje, međuspratne konstrukcije i sl.),

primjenom savremene specijalističke opreme (induktivni davači pomjeranja, akcelerometri, mjerne trake za sve tipove materijala, inklinometri), što omogućava mjerenje ugiba i pomjeranja, vibracija, frekvencija i perioda oscilovanja, deformacija i naponskih stanja, dinamičkih koeficijenata, uglova zaokretanja i popustljivosti spojeva, itd. **„Naša firma je proširena na područje ispitivanja svih tipova konstrukcija i konstruktivnih elemenata probnim statičkim i dinamičkim opterećenjima, te smo nabavili najsavremeniju specijalističku opremu za ispitivanje. Na ovom poslovnom susretu smo pozvali stare i nove potencijalne saradnike kako bi im prezentirali tu vrstu opreme na specijalno izrađenom modelu“**, izjavio je predstavnik firme „Vatrostalac“ Nesib Šećirbegović. Pojasnio je da se ova oprema koristi za razne vrste ispitivanja konstrukcija, kao što su ekstra osjetljivi senzori koji mjere vibracije, frekvencije, period osciliranja, pomjeranja, detonacije i ugibe.

Na poslovnom susretu je istaknuto da postoji veliki broj objekata kojima se nakon izvođenja moraju ispitati probna opterećenja, kao što su mostovi, sportske tribine, krovni nosači, rezervoari, silosi i drugo, te na taj način dobijaju upotrebnu dozvolu za daljnje korištenje. Firma „Vatrostalac“ Tuzla želi



da u narednom periodu kroz poslovne susrete svi učesnici u građenju, projektanti, izvođači, nadzorni organi i nadležne inspeksijske službe, budu upoznati sa novim dostignućima u razvoju mjerne opreme i mogućnostima primjene kod ispitivanja konstrukcija, istaknuto je na sastanku. Predstavnici firme „Vatrostalac“ su u kratkoj prezentaciji sve prisutne upoznali sa cjelokupnim poslovnim programom firme, a zatim je izvršena praktična demonstracija mogućnosti navedene mjerne opreme za ispitivanje konstrukcija, na specijalno izrađenom ispitnom modelu. Cilj ovog poslovnog susreta je da se svi učesnici u građenju (projektanti, izvođači, nadzorni organi i nadležne inspeksijske službe) upoznaju sa novim dostignućima u razvoju mjerne opreme i mogućnostima primjene kod ispitivanja konstrukcija.

D.K.



Aktivnosti u Komori...

INSTRUKTIVNI PRIPREMNI SEMINAR ZA POLAGANJE PRAVOSUDNOG ISPITA

Kantonalna privredna komora Tuzla u saradnji sa Federalnim ministarstvom pravde Bosne i Hercegovine i Ministarstvom pravosuđa i uprave Tuzlanskog kantona organizuje Instruktivni pripremni seminar za polaganje pravosudnog ispita. Cilj seminara je da se diplomiranim pravnicima koji ispunjavaju zakonom propisane uvjete za polaganje Pravosudnog ispita omogući da steknu dodatna znanja i praktična iskustva od strane predavača iz pojedinih pravnih oblasti, imenovanih od strane Federalnog ministarstva pravde, te time olakšaju pripremu za izlazak na ispit. Seminar traje 120 časova a obuhvata problematiku iz svih stručnih predmeta koji su predviđeni programom za polaganje pravosudnog ispita. Predavači su eksperti iz pojedinih oblasti. Seminar koji se obavlja u velikoj sali Kantonalne privredne komore Tuzla počeo je krajem avgusta. Predavači su sudije i eksperti iz određenih oblasti prava. Rad se organizuje u grupama od 20-30 polaznika što omogućava aktivno učestvovanje polaznika i diskusije o problematici koja se obrađuje na nastavi. S obzirom da se radi o predavačima sa dugogodišnjim iskustvom u sudskoj praksi, polaznici imaju priliku na osnovu praktičnih problema i slučajeva da usvajaju znanja. Još uvijek je moguće prijaviti se za seminar pa se pozivaju zainteresovani da popunjenu prijavu koja se nalazi na www.kpktz.ba pošalju na fax: 258-271 ili e-mail: komora@kpktz.ba. Kontakt osoba Milica Vujec.



KANTONALNA
PRIVREDNA
KOMORA TUZLA

• Nove članice Komore

U posljednjih mjesec-dva ponovo je zabilježen porast interesovanja za članstvo u Kantonalnoj privrednoj komori Tuzla, ulazak u porodicu velikog broja privrednih subjekata na području Tuzlanskog kantona. Evo novih članica:

- "Alen co" doo Tuzla
- "Bosna-niless" doo Lukavac
- "Sicon sas" doo Tuzla
- "Agro Mujčinović" doo Gradačac
- "Fruits & More" doo Gradačac
- "Maočanka-Commerce" doo Maoča - Brčko
- PZ "Late" p.o. Gradačac
- "Fratello Aress" doo Gradačac
- "Grin" doo Gračanica

Izdavanje ATA karneta

OBRAČUNSKI PERIOD APRIL-JULI 2013. GODINE

Nastavlja se izdavanje ATA karneta u Uredu Vanjskotrgovinske komore Bosne i Hercegovine u Tuzli pri Kantonalnoj privrednoj komori Tuzla. Podizanje dokumenata vrši se na mjestu gdje je zahtjev i podnesen. **"Kada su u pitanju izdati ATA karneti i dodatni listovi u periodu od 17. aprila 2013. do 31. jula 2013. godine kada je izvršen obračun, pristigla su 102 zahtjeva. Od toga je bilo 54 zahtjeva za izdavanje ATA karneta i 48 zahtjeva za izdavanje dodatnih litova za ATA karnet. Od 54 zahtjeva za izdavanje ATA karneta, 37 zahtjeva su podnijela fizička lica iz sljedećih opština: Lukavac, Brčko, Tuzla, Srebrenik, Gračanica, Srebrenica, Kalesija, Gradačac, Bijeljina, Teslić, Ugljevik, Šamac, Zvornik i Donja Mahala, a 17 zahtjeva su podnijele firme iz Bijeljine, Lukavca, Brčkog, Doboja, Kalesija, Tuzle, Živinica i Gradačca. Ukupno 41 fizičko lice podnijelo je zahtjev za izdavanje dodatnih listova, a 7 zahtjeva stiglo je u ime privrednih društava",** izjavila je Suada Rekić stručni saradnik u Uredu za pružanje informacija o ATA sistemu i izdavanje ATA karneta Vanjskotrgovinske komore u Tuzli. Sve dodatne informacije, kao i potrebne upute o ATA sistemu i obrasce, zainteresirani mogu pronaći na web stranici Vanjskotrgovinske komore BiH www.komorabih.ba ili direktno – na osnovu dole navedenih kontakt informacija kao i u Uredu Vanjskotrgovinske komore Bosne i Hercegovine u Tuzli pri Kantonalnoj privrednoj komori Tuzla - Trg slobode bb – 75000 Tuzla - Tel/fax. +387/35/258-266 i Fax: +387/35/258-271, Email: atatz@komorabih.ba - kontakt osoba: Suada Rekić.

D.K.




PRIVREDNA KRETANJA NA PODRUČJU TUZLANSKOG KANTONA


Privreda Tuzlanskog kantona je u prvih sedam mjeseci 2013.godine u odnosu na isti period 2012. ostvarila rast industrijske proizvodnje od 0,7%. Prema glavnim industrijskim granama, pad je zabilježen u proizvodnji energije (-7,1%), intermedijarni proizvodi (-2,1%) dok je rast proizvodnje zabilježen kod netrajnih proizvoda za široku potrošnju (0,7%), trajnih proizvoda za široku potrošnju (21,3%) i kapitalnih proizvoda (32,2%). U osam privrednih grana je došlo do pada proizvodnje u odnosu na prosjek iz 2012. godine, dok je rast ostvaren u 18 privrednih grana. Najznačajniji rast obima industrijske proizvodnje u julu 2013. u odnosu na prosjek iz 2012.godine je ostvaren u proizvodnji tekstila, električne opreme i proizvodnji baznih metala, dok je najveći pad zabilježen u kategoriji vađenja uglja i lignita, proizvodnji koksa i proizvodnji pića.

U osam mjeseci 2013. godine iz Tuzlanskog kantona ukupno je izvezeno proizvoda u vrijednosti od 693 miliona KM što je u odnosu na isti period prošle godine rast od 5,4%. U isto vrijeme je došlo do pada uvoza od 1,65% te je uvezeno roba u vrijednosti od 838 miliona KM. Pokrivenost uvoza izvozom je 82,73%, a u istom periodu prošle godine je bila 79,77%. Vanjskotrgovinski deficit Tuzlanskog kantona je 144,6 miliona KM i za 13% je manji u odnosu na isti period prošle godine. Najveća vrijednost izvoza je kao i do sada ostvarena kod izvoza: karbonata, peroksikarbonata, dijelova za autoindustriju, koksa, obuće, kugličnih ležaja, a najveća vrijednost uvoza je kod kamenog uglja, zračne ili vakumske pumpe, lijekovi i govede kože. Najznačajniji vanjskotrgovinski partneri Tuzlanskog kantona su Njemačka, Slovenija, Italija, Hrvatska i Austrija.


Struktura izvoza



Struktura uvoza



Prema podacima Federalnog zavoda za zapošljavanje, u julu 2013.godine u Tuzlanskom kantonu je bilo zaposleno ukupno 80.780 osoba. U odnosu na prethodni mjesec, broj zaposlenih je veći za 0,2%, dok je u odnosu na prosjek 2012.godine manji za 0,1%. Prerađivačka industrija i trgovina zapošljavaju najviše osoba. Prema podacima Federalnog zavoda za zapošljavanje, u avgustu 2013.godine je registrovano 100.403 nezaposlene osobe ili 1,27% više u odnosu na juli 2013. Prema stručnoj spremi, najviše je KV i NKV radnika, a slijede osobe sa srednjom stručnom spremom.




Prosječna neto plata u Tuzlanskom kantonu iznosi 730,00⁰ KM što je ispod prosjeka Federacije BiH. U odnosu na kantonalni prosjek iz 2012.godine, došlo je do pada neto plaća za 0,7%. Najviše prosječne neto plate u Tuzlanskom kantonu su u sektoru proizvodnje i opskrbe el.energijom, plinom i vodom, dok su najniže prosječne neto plate u građevinarstvu.

HERCEG

PVC i Al prozori i vrata

www.dooherceg.com

HERCEG
30
SREBRENICA
GODINA
TRADICIJE
1983-2013



Štedimo energiju,
čuvajmo okolinu!

TROCAL®



Kupovina na rate

**BEZ
KAMATE
I NAKNADE**



Više mogućnosti, više slobode!

Sa kreditnom MasterCard Charge karticom NLB Banke

Izaberite jednostavan i siguran način plaćanja sa MasterCard Charge karticom NLB Banke, koja Vam pored odgođenog plaćanja do 50 dana, od sada omogućava i plaćanje na rate.

- **Gdje?** Na prodajnim mjestima koja su označena naljepnicom Banke „Kupovina na rate“
- **Na koliko rata?** Do 12 rata, bez kamata i dodatnih troškova
- **Iznos kupovine?** Zavisno od visine raspoloživog limita na Vašoj MasterCard Charge kartici
- **Dodatna dokumentacija?** Nije potrebna

Još uvijek nemate NLB MasterCard Charge kreditnu karticu?
Posjetite najbližu poslovnicu NLB Banke i zatražite svoju karticu!

NLB  **Banka**
Znam zašto.